

Budimir ponovo optužen zbog pomilovanja kriminalaca

Kantonalno tužilaštvo u Sarajevu podiglo je danas optužnicu protiv predsjednika FBiH Živka Budimira i još pet osoba zbog zloupotrebe položaja, nezakonitog posredovanja, te davanja ili primanja dara i drugih oblika koristi.

Osim Budimira optuženi su i njegov savjetnik Petar Barišić, predsjednik Jedinствene organizacije boraca (JOB) FBiH Saud Kulosman, predsjednik Komisije za pomilovanja Hidajet Halilović, bivši zastupnik u Predstavničkom domu FBiH Željko Asić te Armin Kulovac.

U zahtjevu sudu Tužilaštvo je predložilo saslušanje 58 svjedoka i izvođenje 400 materijalnih dokaza. U ovom tužilaštvu ne žele govoriti o detaljima iz optužnice.

Krajem 2013. Tužilaštvo BiH podiglo je, zbog pomilovanja osuđenika i uzimanja mita, optužnicu protiv istih osoba, te ministra pravde FBiH Zorana Mikulića. Međutim, suđenje nije počelo, jer se Sud BiH ubrzo proglasio nenadležnim, te je predmet je ustupljen Kantonalnom tužilaštvu. Nova optužnica, koja je, prema informacijama iz Tužilaštva, nešto kraća, ne uključuje Zorana Mikulića.

Predsjednik FBiH je ranije bio optužen da je osuđenike za različita krivična djela na nezakonit način pomilovao, oslobađao od zatvorskih kazni te ih brisao iz krivične evidencije. Prema navodima optužbe, on je sam ili uz pomoć drugih optuženih, samoinicijativno ili na intervenciju političara i kriminalaca, potpisivao pomilovanja.

Među pomilovanim su osuđenici za ubistva, pokušaje ubistava, porezne utaje, trgovinu drogom, kao i višestruki povratnici u izvršenju krivičnih djela, osobe koje su bile u bjekstvu i osobe koje su čekale ne izdržavanje kazni.

Optužnicom Državnog tužilaštva protiv Živka Budimira i ostalih bilo je obuhvaćeno 27 pomilovanih osoba, među kojima su: Merced Hadžić Švicarac, Naser Orić, Elvis Hodžić, Damir Vašiček i Alija Delimustafić.

Prema ranijim navodima Tužilaštva BiH, Budimir je dobio mito od 40.000 eura za [pomilovanje Mersedada Hadžića, zvanog Švicarac.](#)

Hadžić je bio osuđen na dvije i po godine zbog ubistva, a pomilovan je u augustu 2012. godine, nedugo nakon početka izdržavanja kazne. Također, Državno tužilaštvo tvrdilo je da je ministar Zoran Mikulić od Komisije za pomilovanja tražio da donese pozitivno mišljenje za pomilovanje Hadžića, iako je ona ranije bila protiv pomilovanja.

“Ja ni jednog trenutka nisam pokušao osporiti da je bilo prema meni intervencije, zamolbi da se pomogne određenim ljudima, ali to nije protuzakonito. To je lobiranje“, rekao je Budimir u ranijem razgovoru za Centar za istraživačko novinarstvo (CIN) i dodao da je uvažio molbe koje su se odnosile na socijalno ugrožene osuđenike. Budimir je negirao da je uzimao novac za pomilovanja.

Budimirov advokat Ragib Hadžić je danas za CIN izjavio da nije obaviješten o novoj optužnici protiv njegovog klijenta te da je od novinara saznao o tužilačkom aktu.

„Po običaju našeg pravosuđa je o tome saznajem tek od Vas. Vi ste mi uhvatili muštuluk“, kaže Ragib Hadžić.

Prema istraživanju CIN-a, najmanje tri osobe su od Budimira dobile pomilovanje za djelo za koje su već bile pomilovane. Riječ je o bivšem predsjedniku Vlade Tuzlanskog kantona Hazimu Vikalu, bivšem ministru Policije BiH Aliji Delimustafiću i bivšoj službenici Općinskog suda u Čapljini Ireni Obradović.